

博野縣志卷六

儒林

傳列儒林昉自史漢傳經受業各自名家師資
所承釐然分著歷代因之未嘗有異迨至宋史
別爲道學識者議之今仍舊目溯程委之流風
爲諸儒之楷法云

宋

程顥字伯淳世居博野之程委邨後徙居河南祖羽
太宗朝三司使父珣以仁宗錄舊臣後爲黃陂尉

累轉太中大夫顯舉進士調鄆上元主簿遷晉城
令在縣三歲民愛之如父母熙寧初用呂公著薦
授太子中允監察御史裏行前後進說甚多務以
誠意感悟主上嘗勸帝防未萌之欲及勿輕天下
士帝俯躬曰當爲卿戒之居職九月數論時政乞
去言職安石本與之善及是雖不合猶敬其忠信
不深怒但出提點京西刑獄顯固辭改僉書鎮寧
軍判官旣而罷歸哲宗立召爲宗正丞未行而卒
三十四顯其性過人充養有道和粹之氣益於

面背門人交友從之數十年未嘗見其忿厲之容
自十五六時與弟頤聞汝南周敦頤論學遂厭科
舉之習慨然有求道之志泛濫於諸家者幾十年
返求諸六經而後得之教人自致知至於知止誠
意至於平天下洒掃應對至於窮理盡性循循有
序其死也士大夫莫不哀傷文彥博題其墓曰明
道先生嘉定十三年賜諡曰純公淳佑元年封河

南伯從祀孔廟

按明道先生歷任簿令皆有政績然傳道爲大
節錄宋史不復詳載伊川先生事蹟亦從刪云

程頤字正叔年十八遊太學胡瑗得其文大驚異之
卽延見處以學職呂希哲首以師禮事之治平元
豐間大臣屢薦不起哲宋初司馬光呂公著共疏
其行義詔以爲西京國子監教授力辭尋召見擢
崇政殿說書每進講色甚莊繼以諷諫聞帝在宮
中盜而避蟻誠恐傷之頤曰推此心以及四海帝
王之要道也神宗喪未除冬至百官表賀頤言節
序變遷時思方切乞改賀爲慰旣除喪有司請開
樂置宴頤又言除喪而用吉禮當因事張樂皆從

之帝嘗以瘡疹不御邇英頤詣宰相問安否且曰
人主有疾大臣可不知乎翌日宰相以下始奏請
問疾蘇軾不悅頤門人賈易朱光庭不能平合攻
軾胡宗愈顧臨詆頤不宜用孔文仲極論之遂出
管勾西京國子監久之加直祕閣再上表辭董敦
逸復劾其有怨望語去官紹聖中削籍竄涪州徽
宗卽位復其官又奪於崇寧卒年七十五頤於書
無所不讀其學本於誠以大學語孟中庸爲標指
而達於六經動止語默一以聖人爲師故卒得孔

世里集志 卷六
孟不傳之學爲諸儒倡其言之旨若布帛菽粟知
德尤尊崇之平生誨人不倦故學者多出其門淵
源所漸皆爲名士世稱爲伊川先生嘉定十三年
賜諡曰正公淳佑元年封伊陽伯從祀孔廟

明

陳瓚程委人正統戊辰歲貢澹于仕進孜孜以重修
二程夫子祠爲己任恢宏殿宇增廣肖像朔望展
拜恭奉遺書跪讀於側務期身體而力行之至老
不倦見鄉後進必語以學步先儒爲千古傳人

可自暴自棄與世俗同流鄉黨皆師宗之

國朝

蘇德星字甘石西莊頭邨歲貢幼孤父鳴珂前明辛酉孝廉母孟氏相繼沒世旣而祖應春又卒祖母朱氏前明鳳翔太守朱英公女也爲之撫養成入德星奉教惟謹言坊行表食餼於庠諸生多師之祖母卒於順治十四年德星廬墓側每讀禮哀聲動人有羣盜乘馬夜過聞之相顧戒曰此蘇孝子也勿使震驚啣枚而去顏習齋嘗咏其事云慈

孫爲孝子讀禮淚沾襟正氣塞天地狂徒不敢侵
終喪三年學徒益衆妻許氏工詩詞善書法前明
兩淮運使許國士公女也不敢挾貴以驕夫家當
德星廬墓時氏居家讀禮督課二子後皆入泮孫
遠丁父憂倚廬于中門外動必以禮人稱篤行貽
謀云

彭大訓字永年屯莊人少穎悟有至性年十六補博
士弟子員旋食廩餼康熙丁丑貢入成均不就因
齟齬遭明季兵燹母崔被劫聞人言及輒號哭欲

絕無意仕進惟居鄉授徒竭力奉親父經續娶者
三永年皆曲意承順孝子之名徹于蠡博顏習齋
通書拜訪委心納交常稱其兼有直諒多聞之益
家教甚嚴義方懋著子元直廩生元真邑庠生賤
贈蔚州鄉學訓導長孫維揚邑庠生次孫喆士司
訓密雲砥礪廉隅與諸生疊疊講道義士林方之
蘇湖教授以年暮告休餞送者數十里絡繹不絕
季孫嘉士司訓蔚州聲名與兄埒曾孫磊英奇英
日恭日從俱邑庠生

鍾鏐字金若營里人受業于顏習齋之門學六藝正
九容負經世畧壯歲補弟子員老而不遇學者稱
爲逸叟初習齋如漳南書院設教擇及門之賢者
祖洽遠方鏐杖策從遊左右就養往返千里舉舉
無愆儀有客與習齋語於市肆見其佩刀侍立問
曰若能舞刀耶鏐謝不敏習齋目之曰能舞何爲
謾應鏐則長跼謝罪客爲勸掖不敢起久之習齋
曰起舞刀鏐再拜稽首乃起舞當是時稠人廣集
觀者如堵見其頌禮甚都步伐中節莫不嗟異魏

人路驥皇曰是所謂聖人之徒也錢美髯垂臍聲如洪鐘道貌岸然見者起敬雍正改元以生員學行兼優者充講約于是邑侯趙公請錢從事每逢月吉侃侃宜講衆皆心開趙公深加器重詢以地方利弊錢列十事趙公委心納之歡若平生終不枉見於私室趙公曰是博陵之澹臺也夫錢內行篤修幼奉父訓衣冠必整雖盛暑終身不敢除幘歲時朔望拜母與妻交拜至老不衰丁母憂年已六十有四禮當不毀而疏食於外寢苦御冬人皆

難之卒年七十有九門人私謚孝端先生子淑世其學

李植秀字果齋其先祁州人曾大父應夏遷居博野之莊頭邨幼聰慧驚直受書塾師師憐其才而貧也每推食食之比長聞習齋以三物立教遂往受學立日譜考身心言行得失文名藉甚孫檢討莪山掌教保陽羅致書院以雙親老辭歸設教營養無館則負耒灌園仰事俯畜怡如也晚年貢入成均格於規費不就究心卜筮醫藥曰此亦韋布利

濟之一端也然人憚其嚴峻竟瓠落不遇卒年八十有八

李率祖字欽止邑中歲貢學博高公贈以匾額口品行端方士林咸稱知言初康熙年間邑侯杜公特建義學慎選明師而難其人學博以率祖對杜公延見深加敬禮請主講席授徒四十餘人彬彬敬業成就人才甚多杜汝礪劉貫一諸子皆其高弟也前在祁州設教十四年刁方伯承祖李孝廉繼渤同登己卯賢書仕隱各成其學子臯司訓吳橋

李泮字月池胡家莊人父若柏賦性剛直生三子家
教甚嚴而泮居長色養無違率二弟以盡孝道語
言醇謹舉止端方弱冠補博士弟子員每試優等
外鄉爭延致爲師見尹少宰以孝廉設教於其鄉
心悅誠服執贄受業每聞教誨文行兼修踰年甲
辰遂中順天鄉試副榜方見其進也俄而賫志以
歿弟濟業儒涇庠生亦相繼而亡子受書乾隆庚
辰舉人

劉貫一字古衡邑中人狀貌魁梧美髯連鬢博學彊

志至性過人嘗設教都門有盛饌不食食其常味
門人問故答曰家有老親恐缺甘旨不忍下咽也
久之辭歸父患未疾語言莫辨而古衡以意揣度
飲食便溺不爽其候及居喪哀毀盡禮七日之內
鬚髮皓然見者嘆其篤孝弟克一以孝廉纂修集
成館十有餘載撫其猶子恩逾已出雍正癸卯拔
貢成均年逾強仕矣不憚百里請業於李恕谷之
門恕谷稱爲傳道得人三月上辛祀顏習齋於蠡
吾雨甚門人曰古衡不來矣請供執事恕谷曰少

待俄而古衡冒雨奔至恕谷喜曰吾固知其必來也古衡教人以禮法爲先來學者不計束脩進學者不索謝儀生徒衆多分立學長以統之條理秩然每朔望令節率諸生拜先師又令同儕序齒相揖成就人才徧於閭里尹少宰假歸養親古衡擇其弟子之英俊者登堂請益敦行禮儀至老不怠卒年五十有九門人私謚孝莊先生

徐曰模字範茲故明河南左布政使徐行之仍孫也生而醇正動有禮法弱冠補博士弟子員二十九

歲登康熙甲午科賢書次年赴春闈適同號程生
持經藝就質號役告之當事因下吏誠邸聞之立
傳訊得白遂留邸教習當是時王總裁集成館書
局延攬名流遊其門者通顯可立致而曰模守株
且十載確乎不拔自處泊如也王以此益重其爲
人雍正元年奏爲世子師訓極嚴世子有過督責
不少恕王隆禮備至每進見執賓主禮甚恭久之
歸里設教於蠡博之間造就人才甚衆成進士者
三人登賢書者五人選拔入成均者四人至列膠

庠食廩餼者指不勝屈尹少宰之終養也嘗建共
學堂文社延主師席及門數十人月課三百餘藝
日模年已近耄談文事育英才歷晨夕不倦四方
學士尤景重焉程邑侯行鄉飲酒禮請爲大賓四
方來觀皆稱名實不媿大典云卒年七十有七子
二燾杰俱邑庠生

苑廷弼字亮工南邑歲貢幼失恃善事繼母年逾五
旬猶廩廩如少時趙邑侯表其閭曰孝思維則設
教於家鄉人來學多方誘掖不計束脩厚薄其教

法以正容體爲先命諸生賓賓孫業終日端坐無
欠伸狀及論文則從頌相說以解人皆憚其方巖
而樂其和易故友教四十餘年從遊者多知名庠
序旣歿門人共建祠堂于其家私謚懷長先生

馬希顏字心齋堤圈人少貧從父治田年十有五始
讀書越十載入邑庠不志于穀事親色養飲食起
居晝夜不離側居喪當六十不毀之年倚廬守禮
朝夕飯脫粟二盂過期始食蔬菜終三年無改平
生禮讓自持從無傲語遇鄉人爭訟力爲解紛卽

丐者至門周急亦無愆儀見有盜其園果者趨避不前或問之則曰彼在樹上恐其驚而墜也設教鄉塾數十年不受脩儀學中泊如也冢婦孀居季女少寡爲之立嗣命諸子讓產全貞家中穆如也邑侯李公顧公舉鄉飲介賓者再邑人尹孝廉行養老禮于義學授杖授衣進冠履如儀鄉里益賢之卒年七十有五子沛霖邑庠增生

房魁盛字擢元八歲時卽能日記千言爲大父所鍾愛弱冠後入邑庠應鄉舉再薦不售遂置意科名

私淑習齋之教嘗與李恕谷鍾逸叟李果齋張白石講明實學矢志敦行于是鄉曲英才請業者日集卒年七十有九門人私謚靖長先生

顏禮立字成齋北楊村人幼讀書卽通大義年十九補博士弟子員與蕭楚南王孟恭諸子結社爲文竟不獲售然無怨尤之色常以養親爲樂每食必有酒肉日者謂其年止六十有四不得送死深以爲憂竟過其數居喪當不毀之後哀毀骨立喪葬如禮服闋後與王孟恭陳協恭諸子結樂餘社作

詩甚多人以詩文就正皆善誘之設家塾以教子
孫嘗曰吾無他異惟有不作心上過不去的事不
生事上過不去的心而已卒年八十有二後學私
謚文惠先生

劉亨禮初名繼泌績學能文補弟子員旋食廩餼每
試輒冠其曹矜才負氣有不可一世之概及見尹
孝廉廬墓東章居相近不時觀禮久益誠服踵門
請業孝廉以表叔尊行固辭之亨禮四拜於門外
而後入見孝廉授之小學則身體而力行焉再授

之三禮析疑則益感奮究心義蘊非禮不行于是
更名亨禮以示專心卒業云易州單太守居里第
以十三經教子博訪鴻儒躬造其廬以禮延致師
席甚相得也久之高少司農知名聘于江南權使
官廨命子受學焉踰年以家事北歸見尹公子綬
淳識度敦敏以爲神童日與言詩而所養益邃未
幾卒於家儒林咸悼惜之

文苑

文苑之名昉于後漢而未序其意指論者或有疑焉不知聖門設科終以文學亦各得其性之所近而已何害于道乎况博陵尙質或失之野翰墨稀傳今斷自所知具列如左

明

徐聯芳布政使行之子也幼而聰慧敏于爲文下筆千言立就弱冠成進士入翰林與北海馮琦相友善唱和詩章甚夥擢叅政不就拂衣歸里每郊遊

得句自謂飄飄有凌雲氣蓋其性好神仙視去富貴如敝屣也所著登瀛集毀於兵燹無存

國朝

李宏祖字康侯前明戶部郎中自滋之仲孫也幼孤事母以孝聞既長痛父早世發憤讀書入邑庠尋食廩餼應京兆試遇無賴以非禮相加拂袖而歸誓不復往雍正元年貢入成均亦不就高臥清齋勵容函丈闕北窻以寄傲南臨街百舉武不設藩籬遙望高士來則欣然與之進俗人至則勃然

麾之去嘗有吏胥趨之而揖瞋目叱之曰走狗何敢
與人拱手吏胥披靡退却其天性豪邁以風節自
持類如是故士林嚮服名震博陵晚年好吟詩中
宵起舞撫劍太息曰大丈夫壯遊四方安能鬱鬱
老死故鄉耶遂之江南放乎兩淞至于淳安慨慕
海剛峯遺蹟留連久之已而自中州適湖廣登峴
山入隆中尋臥龍之故廬尤嚮往焉作詩屢進益
工得力江山之助爲多題曰柳園集藏于家卒年
八十有三子元司訓趙州

杜汝礪字荆山邑中人少聰穎于羣兒中獨兩目炯
炯瞻視異常性嗜學尤工帖括體弱冠補博士弟
子員是時劉古衡及弟今衡徐範茲俱有俊才而
荆山稍長日同研席夜篝燈佐讀每論文至夜分
興益豪聲益朗同儕輩竊聽之每嘆苦而去丙戌
歲京畿學使梅公月川校士保陽拔置博野第一
因延入署分閱試卷時人以爲榮甲午秋以尙書
中舉人毫不色喜衣冠仍布素四上春官皆下第
同輩無不扼腕謂文如荆山不遇乃可言命也雍

正元年臘月既望卒于家尹少宰爲之作傳

高第字殿元杜家莊人性穎悟善爲文見前明萬二
愚藏稿以爲先正典型獨得聖賢精蘊于是心摹
手追辦香不二督學陳公賞識奇文遂拔優等食
廩餼不知者置三等亦夷然不屑也聞人有才學
卽愛之慕之多方以成就之按月課文一切食用
皆供給之終始不倦其登科第者有趙紫垣十雲
卿諸人而尹少宰年最少卽深器之卒年七十

趙相如字容頗杜村人好吟詩出口成章敏捷千首

登康熙庚子鄉薦與尹少宰同年交日深及其老也移居邑中數共晨夕興致益豪著有詩集十卷藏於家

王邦敦字作翰邑中人性聰敏幼學卽多穎悟延清苑王刺史雲卿爲師雲卿與邑中劉刺史今衡尹少宰元孚祁陽刁孝廉紹武結社爲文風雨無阻高談史漢長吟李杜時人莫之省也皆以四才子目之四子方困于諸生時人亦且目笑存之惟邦敦傾心悅服是以詩文日進于高融然亦久困諸

生乾隆丙辰始登賢書當是時翰林掌院學士邵公基實主順天鄉試廓清墨腔欲拔俊才得邦敦卷大加欣賞榜發進見自詡得人期以遠到乃閱五載而邦敦云亡時王劉諸君旣沒尹少宰歸養里第爲作挽歌四章士林垂涕傳誦子存敬廩膳生

杜琳字素存荆山之從子也荆山以甲午舉于鄉至乾隆甲子而素存得舉皆以宿學奇文晚而後遇爲博陵之望初辛酉鄉試素存文章固已老更成

矣而不獲售請益于尹少宰則曰吾嘗從遊學幕
分校四年徧閱十郡諸生試卷其佳者暢茂條達
百邑同風若以少爲貴其江西五家乎素存唯唯
受教而退盡捐故習冥心孤詣力追章羅神髓比
及三年果受知于座主汪冢宰贊賞不置遂登賢
書越三載少宰督學江蘇攜往分校所拔多老儒
亟稱其不負所學云

仕績

不仕則績無由考無績則仕不足言績以仕而
咸熙仕有績而斯顯固將天功時亮匪徒人爵
爲榮也程子云一命之士苟存心於愛物于人
必有所濟可以觀政矣其崇祀鄉賢者別有列
傳茲不重出

唐

程日華爲張孝忠牙將性寬厚得人心奉使至滄州
軍亂李希烈逼領州刺史事不從德宗嘉之拜爲

御史卒贈兵部尚書子懷直嗣爲節度使

宋

郭進倜儻任氣累官衛州刺史設計平盜郡民詣闕請立碑頌德改洺州團練使嘗於城壕植柳種荷芰蒲芡後益繁茂郡民見之垂泣曰此郭公所種也積功屢遷雲州觀察使判邢州卒贈安國軍節度使

張玉隸狄青麾下善用鐵簡仁宗稱爲真勇將官至馬步虞候

元

史弼字君佐身長八尺力舉五百斤踴而蹋壁上下如飛通蒙古語讀書獵大義恂恂惇謹世祖召見引滿干鈞弩試輒摧堅遣佐元帥劉整攻襄樊取松堡屢戰屢勝以功多拜總管六轉至福建行省平章事征瓜哇以五千人渡海二萬里俘其王加封鄂國公子立義鎮守贛州萬戶其塋域後裔在東陽村西南隅

王好德至正間爲唐縣尹深識治體勇敢決斷以興

學育才爲先務興利除害扶善懲惡三年民風丕
變治道爲幽燕稱首

明

姬珪永樂間知淮安府政平訟息民甚宜之九年秩
滿部氓詣闕乞留涖官至二十年之久

李剛勇力絕人宿衛京師值蕃人恃力求校時無有
能當之者剛應募相與搏于奉天門下一舉仆之
蕃人股栗稽首降服

孟潮從父侍郎鑑征廣東海寇戰于平地賊敗入山

先是軍中謠云若是北軍勝南除非山上行船潮
令造紙船藏卒于內登山而攻賊見之股栗遂敗
潮單騎追賊六人于窮岩斬首以歸得寶鏡七枚
以獻

朱諒魯橋驛驛丞治大水捐俸結網取魚濟民又爲
粥食之全活甚衆

高耀任高淳縣主簿善決疑獄每隨巡按訊鞫甚倚
任之

王一鳳字奇峯七歲能詩號爲神童日記數千言十

二歲入泮中隆慶丁卯科舉人歷官兗州府同知到任後有以一門三寃具呈者公詰其狀并無兇首詢其原委則有族中秀才廬墓或服白衣巾夤夜入室其母覺而召子至家責之曰汝旣每夜歸來何必廬墓其子無以自白因而自縊其妻見夫死自知失身非人亦自縊其母因子婦偕亡涕泣而絕公聞之默然忽見堂上有烏鴉脚黃谷魚墜下熟視良久問吏胥曰郡有黃谷村耶應曰有問村內有子姓耶應曰有一子相公公憬然卽傳翌

日月課課畢獨留于生在齋問其父母在否于生云幼孤寡母在堂公潜使幹役往取白衣巾其家與之公執訊于生日汝父死已久汝母在堂白衣巾何用于生卽吐實情公置于法三寃得雪兇人傳爲神斷子三長典歲貢次興進士季與歲貢孫曾科第不絕

國朝

鄭植字本厚前嶧縣令景洛之長公子也嘗隨父任素習吏事急于自效以捐貢援例除洛陽縣令

當是時制府田文鏡督責甚嚴郡縣奉法肩肩惟
思獲譴而植以洛陽洊饑之後民多逋賦困于輸
將終不忍追呼相擾遂以催科無能被劾怡然歸
籍民爲建碑以志遺愛

劉克一字今衡世居邑中生而穎異眉曉間英光炯
炯逼人十歲能文善書法尤工大字甫弱冠府試
冠軍遂補弟子員康熙辛卯登賢書遂銳意進取
不以家食自甘入古今圖書集成館事竣議叙旋
應揀選得融縣令再任富川調繁臨桂歷三縣精

勤懋著民有欠冊則蠲之士有頌揭則焚之惠而致恭上官益嘉其能擢補西隆州牧時瘴氣正厲僚友俱以少需任事爲言克一慨然曰一念爲官一念爲身奈地方何卽日領數僕帶劍携弓矢兼程趨往抵任五日而疾作就醫回省卒于羅里站時年五十有四子廷翰廩膳生

靳毓字慎生鳳凰堡人雍正壬子科舉人乾隆辛未任安化縣令一載有餘緩催科重士習急賑濟恤刑罰堅聽斷崇節儉民皆悅之刻有德政歌竟破

吏議調補建寧府經歷百姓比諸陽道州之撫字
常存共立去思碑

王時憲字體乾邑中人由乾隆十二年府學歲貢入
監肄業適簡親王總理國子事務一見而器之
授以實踐錄三年期滿大有心得任趙州訓導入
年每教諸生亶亶不倦以老歸休尋卒子擊瑯廩
膳生

卓行

後漢列傳始有獨行率以一介成名或亦甘心
小諒唐書易以卓行其風規更足懷矣博雖褊
僻嚮義成風敢記舊聞昭茲來許

明

劉潔程委人永樂時從征東昌北軍過滋水多爲居
民所殺命千戶盡殲其民潔爲嚮導恐傷無辜徐
至其處民多逃匿全活甚衆又以裴徵爲姪幸而
得生後徵爲指揮事潔如父

劉輔潔之子也與艾瑛交好瑛歸省母以在繫之父
爲托瑛父病死潔傾囊歛殯之瑛來後痛哭拜謝
約爲兄弟又病死復殯如其父後以子吉貴封大
學士

呂成英素孝友厚撫姪孫呂樹新等又濟貧苦數百
人知縣董則喻匾曰一方善士

國朝

陳宏任順治元年公舉孝行知縣余文衡匾曰行
一閔子

李直順治二年公舉德行云事異母兄如父撫孤幼
姪如子知縣趙日熿申詳學院行賞孝友可嘉

王應元順治四年公舉孝行知縣鄭瑛匾曰順德可
風

楊襄順治六年公舉德行知縣遲日豫匾曰品孚月
旦

呂元聲同妻蔡氏事繼母如生母孝伯母如親母知
縣熊忠弼儒學王瑾王錫命申上稱其一門節孝

宋會龍孝順繼母晨昏定省親滌溺器凡事稟命始

行奉祖先告朔望每墓祭按塚設食不遺無後者
買石立碣詳書家譜以垂後妻父臨死給銀五十
兩毫不自私盡爲殯葬之費有貧人楊樂賈進祿
李天時死其父後死俱不能葬各出棺助之宋國
龍宋以鎮劉守志俱不能娶各出米麥錢物資之
鄉人相勸爲善知縣郭堯都聞其孝義令爲大鄉
耆講鄉約以作民倡

王孫蕢因母病思肉家貧無措割股奉之知縣郭堯
都表其門曰孝可維風

魏弼直老而好善施藥無間遐邇馨聞

李生蘂康熙四年公舉孝友知縣熊忠弼儒學王瑾
交申道院

時文新平生好善大節克敦撫孤姪化之視猶己子
分家產一半與之子習之克承父志施藥數年近
鄰郡縣全活甚多

馬士達端方正直事母趙氏盡孝善教子孫亦多佳
士知縣舉鄉飲匾日文德俊望

陳從新義俠慷慨當土寇猖獗之時出私囊繕器械

練鄉兵地方無虞知縣遲日豫匾曰文武全才

按以上俱

載舊志

鍾九經字行一營里人少讀書遭母喪產中落貿易

以養父學醫卜以娛親父卒恭兄有珍味必進焉

姪鉉傭房山爲人所制久不得歸九經不遠數百

里拔之以來兄感其義嘗易藥以濟人鄉黨乞劑

不問有無業師蘇卿雲館于房山病革親友憚往

九經獨行以喪歸一時多之平生嚴于教子錢克

成學

尹先知字開六東章人邑庠生好善樂施篤近舉遠
嘗言博施濟衆大聖猶病况在下士力何能逮但
有八種人不可不從厚道篤親念舊尊賢育才矜
孤恤寡敬老憐貧劉兆周每傳遺訓以勸世乾隆
二年以曾孫會一貴貶贈河南巡撫都御史兆周
聞而嘆曰爲善無不報歷久而益彰于開六先生
見之

靳瑛字五修鳳凰堡人邑庠生敦任恤周急難濟貧
乏修橋梁每于冬月施衣施粥不可枚舉其爲遠

近所傳聞者莫大于賑饑之事雍正元年本鄉被災距城四十餘里領賑維艱瑛則出積穀二百五十石和以雜糧按戶分給并捐錢五百千以爲薪水之費里人賴以卒歲二年又饑賑穀與錢如之四年大饑瑛方部署散給糧錢而隣封募義來者甚衆瑛則悉取其陳以食之每人穀一石錢二千篤近舉遠無不霑惠共捐穀三百二十石捐錢六百四十千由是仁聲丕著共建豐碑于其鄉邑侯趙公累徵飲僕子希聖太學生希良歲貢生孫潤

德太倉衛前幫領運千總均能繼善

劉士傑字俊山于堤村人家道殷實多行善事積穀數十石補救隣里凶年有賴凡親朋急難有求必應不計其還待乞兒曲加體恤有病則留宿其家以藥餌救之乾隆九年捕蝗代償夫役飯錢百有餘千衆民感悅太守倪公親至其家待以殊禮縣令表其門稱爲善人

劉元夢字兆周窩頭村人倜儻好施善遇國士而不望報見尹少宰甫七齡卽待以成人之禮歷二十

十聖縣志 卷六
餘年周急不怠遇清苑王雲卿于旅館以弟畜之
後果成進士官刺史其餘濟貧拯難善舉甚夥博
陵皆稱劉兆周云事節母以孝聞忠養期頤既老
而不衰行年七十有七居喪致毀葬母踰月遂卒
子繼泌廩生

馬國翰字建侯陶墟人康熙丁卯科武舉貌腴而古
力闢佛老平生不欺閭室顏其齋曰問心尤篤門
內行海寧陳大宗伯爲題堂名曰潤德周貧恤老
施藥救人善治諸雜症有求者食必吐哺好獎掖

後進有能成立亟加勸勉尹少宰爲諸生時至本鄉必延請爲子姓講說經義孫元文壬戌成進士少宰聞而嘆曰皆伊祖澤所詒也子馴邑庠生孝友蚤世

馬學粹字孟純邑庠生陶墟人家素封因不得子繼母父分出之給以老僕一疲牛一薄田數十畝採蔬而食仍晨昏省視加意承順後以僕勤牛力瘠田多收業因漸豐親愛異母弟倍篤分產與之繼母亦感悅杜邑侯舉鄉飲介賓

馬學孔字季有廩貢生爲父母所鍾愛專心善養不
圖進取事兄亦謹雖析居每事必稟命兄或不悅
惶恐不敢退必悅而後卽安雍正三年饑趙邑侯
欲施粥于通衢卽首捐穀二百石及一切柴薪之
費遠近賴之趙邑侯題其堂曰維持風化嗣舉鄉
飲大賓

馬美秀字文軒歲貢生敦崇古道以父母愛少子期
得歡心田廬器物俱任弟先取而留其粗惡者曰
此吾素所適也工書法育英才里中不能延師者

因而教之成就甚多

蘇昂字東山莊頭村處士侗儻好義中年喪妻石氏爲之依禮制服遺女愛甚擇壻少許可一見尹少宰應童子試而深器之遂定祥人以少孤且貧爲言處士慨然曰尹生文筆鳴鳳國士無雙他日必爲名卿何憂貧賤哉旣而歲試尹遭坎壈爲鄉人所訕笑處士獨輾然慰藉每傾囊以資行李應試京兆康熙庚子尹登賢書人爲處士賀處士夷然曰此特始基耳過三十道大行惜吾不及見也已

而果然處士卒後十有四載女封夫人少宰建節
撫豫給假過里門拜其墓置祭田鄉人皆信處士
有知人鑑嘖嘖稱道子文麟邑庠生讀書立品善
仁術救災傷

蘇持字慎公莊頭人行六少爲姑氏後旣而歸宗五
兄已析居絕不分產獨以勤儉興家孝事寡母生
養死葬以身任之樂善好施凡冠婚喪祭暨鰥寡
孤獨皆有補助雍正三年歲大祲持慨然倒困周
濟貧族卽四鄉踈逃者無不活以升斗鄉里皆以

六善人稱之子作標字成侯邑庠生周急恤貧善繼父志雍正七年歲饑鄉人乏食作標出粟三十石按朱子社倉法行之積粟百石有奇乾隆三年又饑貧者不能完納悉捐之十年謀建祖廟鳩工庀事絕不他委更出已地七畝五分作祭田每爲義倉義塾計病數年臨終猶勗其子爝炆勉力圖之

李士彥字漢卿胡家莊人慷慨好施妻崔氏善佐之凡族黨貧乏有吉凶事罔不周濟每遇歲饑卽出

餘穀給族黨邑侯費公表曰淳喬可風于上林侯
選訓導

鄭欖字積厚前嶧縣令景洛之仲子也弱冠補博士
弟子員不飲酒不戲謔目不邪視耳不傾聽躬不
履市井詩不作綺語識者器之隨父任察民風藉
以興利除害及父喪哀毀骨立以母多疾遂潛心
醫書親製藥餌詳擇古方著有廣仁集丁母憂立
新塋與父合墓植柏數百株又爲考妣建雙孝坊
于南關先是伯兄植自洛陽令罷歸臥病四年諸

事稟命而行奉孀嫂二十餘年家無間言按察使
浦公爲顏額曰孝友堂尹少宰作孝友堂銘方諸
古之張仲云乾隆元年舉孝廉方正給六品頂帶
備用七年鄉飲大賓卒年七十有六子履端孫裔
鵬俱入邑庠

蔣宗禹字明遠城東人候選州同事母盡孝母劉七
十六歲雙目失明齒盡脫履必親扶持每食必
代咀哺病篤焚香祈以身代適雨驟至香火不滅
眾皆驚異後病痊壽逾八十撫孤甥猶已子同居

四十年後爲置宅一所田二頃資其衣食撫堂姪亦如之凡戚族有婚娶殯葬不能自爲者悉慨任之子炳中歲貢生炳坤炳翰俱庠生克世其家

陳子灃字洪波宋村人性豪爽能文章弱冠補博士弟子員尋食廩餼每試優等藉藉知名旣而嘆曰有文事者必有武備豈可趨趨囁嚅老死帖括中耶且吾博夙傳先進勇冠三軍爲國効力今何沒沒無聞也吾將作其氣而振興之遂應武科中武舉設教于家弓矢技勇羅列庭除四方來學者甚

衆得其指授輒登鄉薦長子樞補運糧千總季子
楫尤有偉度而督責倍嚴居宿于外攻苦三年遂
登雍正癸丑科武進士上第擢

御前侍衛外轉助馬路叅將封父招勇將軍親友皆
賀封君曰此其小焉者耳後楫果膺封疆專閩晉
宜昌鎮總兵官

陳增字益菴遷家莊人性敦厚事繼母任氏奉養無
違孝弟力田家業日興每見嫁娶貧乏者俱資助
之雍正三年至五年海饑賑濟里黨趙邑侯聞其

義舉爲農官給八品頂帶卒年七十有一

李瑞祥府庠生父獻蘖與伯父生蘖以孝友聞瑞祥
幼承家範事父母甘旨必供塋祭如禮事兄泰祥
如嚴君年逾六十不敢失儀弟永祥任雲龍州鹽
場承父命往視往返二萬餘里不憚跋涉從孫如
桂幼失怙其祖母鄭母朱二世孀居爲之理家業
二十餘年迄用有成子庭實增廣生充實允實俱
歲貢生兄弟友愛聞于閭里三人出館雖各居一
方凡歲時伏臘禴祀烝嘗必回家聚于一堂其樂

雍雍同財急難疾病相扶持子女無岐視年屆頽
白猶如赤子充實娶三妻二妾允實娶五妻吉凶
繁費皆庭實任之食指二十餘口相處四十餘年
無間言

馬希雍字仲寬堤圈人少貧父母繼亡兄弟六人各
用所長或治家或經商或力田或司賓或讀書同
心努力家業日興同居六十餘年每歲暮周濟親
族廣行義舉邑侯謝公表其門曰善人鄉飲酒特
選爲候弟希襄敬兄尊長治事有才鄉黨皆稱德

寬云

附錄

王忠南邑人善療諸病外科尤精定州王珠患肚癰
日夕疼痛忠視脉後于脚下開膿其瘡遂痊清苑
霍權妻臨產腹脹垂死郡醫無所措手忠投以藥
病婦氣微舉家驚哭忠令靜待煮粥以灌頃臾胎
下人咸神之

按王忠之事載于府志藝術內茲以人少未能
分門而又不忍沒其傳也因思有術能精且以
救人實超出于庸醫需索養癰所爲
是亦任恤之類也附錄示勸餘倣此

李龍光字海三西許村人善經商歲暮旋里夜遇行

客將自縊龍光釋之問其故則以老母在堂無錢
難歸龍光慨然給銀五十兩有尤太守被劾罷歸
載三喪不能行龍光憫之贈以三百金而去尤後
復官謝以車馬幣帛固辭不受

按周禮六行以孝友睦婣任恤爲序由親及疎
所重務本若李龍光者于非親非故之人加以
厚贈似未協于義然鄉人稱其豪
舉亦未可沒也附錄示勸餘倣此

趙辛旺莊頭人雍正七年鬻食鄉郊有束鹿馬光白
路過遺百金至晚來尋卽全與之光白拜謝而去
壽至八十有四

靳瑞鳳凰堡人事親以誠喪葬盡物觀者如堵聞於
邑侯杜公給以孝友堪型匾額

銀成鳳字鳴陽杜家莊庠生弱歲失恃偕弟丹鳳姪
鐘孝子繼母劉氏曲意承歡送死盡禮乾隆六年
闔鄉舉於縣謝邑侯表其間曰一門三孝

按孝爲百行之原必有事實始可徵信若徒舉
其大畧似易藉口然經縣令表間亦宜附錄示
勸餘
倣此

蘇淳字祥美莊頭人家貧傭工度日行路拾一小箱
而回家人欲開視之淳曰不可後本主尋至其家

完璧還之子學孔邑庠生

王行謙字遜恭東章人少讀書以貧中輟力田好義勸人爲善日有孜孜爲尹少宰經理義倉潔已濟衆鄉黨稱爲王好人子垚入邑庠

郝德揚字慈吾北小王村人事父盡心病革嘗糞以卜吉凶進藥獲痊子存誠早世婦祝氏孀居撫孤課讀哲入邑庠纂修家譜三卷本支世記一卷

孔英蘊字麟徵南邑人偶之市見有婦人赤身號寒伏於釜塘者爲之惻然回家取女孫棉衣給之子

玘克家頗富擇里中貧老者每月款以酒食贈以百錢

按鄉曲自好偶動惻隱之心細行似無可取然漢昭烈之勅後主猶日勿以善小而不爲况在衆庶何敢好大而忽細故附錄示勸餘倣此

王仁南邑人其父與母以事成咸寧十有餘年偕亡

遺女方七歲既長適人乃寓書于仁仁大痛謀歸葬而家故貧傭工爲業哀請于主人預取其直奔走三千里外躬負骸骨歸里以禮葬于祖兆見者稱爲能竭其力

按史法蓋棺論定生人不當立傳然既以壹節成名爲鄉黨所稱苟不及時入志無以成人之美故附錄示

勸餘做此

李廷弼新莊人父母繼沒廬墓六年顧邑侯聞而義之賜粟以成其志

馬巨龍字曜甲陶墟人篤門內行性無恚怒王父大
便不利手之不言穢父母愛之每以重事倚任兄
業中落悉力供應焚累世逋券不以聞于後年登
大耄與妻姚氏同健手不持杖遠近稱爲德壽齊
眉姚席豐厚隨嫁粧奩地每歲所入上之翁姑析

居入爲公產子曰璫宰漢陰有惠績

龐希愷馮村庠生精于方技諸凡金刃木傷與壓折
打壞肢體俱以術立痊救人無算從不索謝歷任
邑侯每于驗傷時禮致醫療顧公爲題匾曰妙技
無倫

列女

詩書皆稱女德史漢未列專門誠爲缺典自後漢書始作列女篇摭次才行高秀者原不專在一操嗣是以還史冊相望何容没没今據舊志所載及未被旌者悉列于此以備叅觀

唐

李孝女名妙法當安祿山之亂被刼他州聞父亡欲間道奔喪一子不忍去割一乳留以行既至父已塋號痛請開父墓以視宗族不許復持刀刺心乃

爲開棺以舌去塵以髮拭之結廬墓左手植松柏
有異鳥至後母病或不飲食女終日未嘗親匕箸
及亡刺血書于母臂而葬廬墓終身

楊氏小玉村楊近曾之女天寶朝以淑德選爲王妃
明

邊氏在城社邊甫聖之女弘治朝以淑德選爲臨泉
王妃

張氏王玉之妻生子寧甫七歲玉死氏誓不易志子
寧又夭婦李氏二十二歲生子繼宗少且瞽父母

逼嫁不從繼宗娶袁氏亦早亡李憐其無子命之
改適袁剪髮矢志採織爲生成化三年知縣裴泰
旌曰三節月給糧米各以壽終

李氏孫學之妻正德辛巳流賊至欲犯之氏大罵不
從賊殺之守臣奏聞旌曰貞節

朱氏成化乙酉舉人姚瓚之妻瓚死年方二十善事
舅姑殯葬如儀晚年就養弟家五十年全節而卒
韓氏東許村程問之妻自十八歲守節女適陳蓋二
十三歲守節蓋之子光顯妻陳氏二十三歲守節

皆終其身人咸以爲感化云

王民生員宋允穀繼妻遇兵變罵賊死節

史氏南關鄭鳳翹之妻翹于明季戊寅守城殉難氏
晝夜號哭惟求一死以報夫舅姑勸解其志愈堅
其言愈烈遂託五歲孤鏐于舅姑七日不食而死
後知縣宋珍聞之旌以節烈流芳

按鄭鏐入邑庠舉四子長景洙廩生次景洛成
進士任知縣封鏐文赫郎三景浩四景法俱入
邑庠長孫植任洛陽縣令仲孫櫬舉孝廉方正
曾孫中岳履端元孫裔鵬裔僑均隸文學人種

母德
之報

國朝

王氏前明萬歷庚子舉人呂魁英繼妻二十歲守節歷四十三載知縣熊忠弼儒學王瑾王錫命申上表門

孫氏生員許鎮鼎之母世居同林自三十歲孀居事姑以孝教子以慈年逾八十冰操凜然知縣郭堯都表其門

石氏崇禎庚午舉人蕭逢泰繼妻逢泰于戊寅殉難氏方二十三歲在母家守志備極苦辛儒學教諭

任希尹爲之周急終老

桂氏戊寅殉難李四知之妻苦節撫孤子生藥獻藥
呈藥俱入庠知縣張志尹熊忠弼題匾表門

霍氏前明兵備道陳日堯之妾二十二歲守節知縣
郭堯都題匾表門

程氏故民陳鳴九之妻二十二歲苦節知縣郭堯都
題匾表門

魏氏生員王信之妻幼年矢志知縣郭堯都表其門
日柏舟霜節

王氏辛莊民婦二十七歲守節撫夫前婦之子李自芳歷三十八載以苦節終

王氏西許村民婦二十二歲孀居無室無田艱苦終身壽至八十三歲

馬氏南邑楊民畏之妻二十二歲守節家道貧寒慈養三子孝事舅姑壽至八十餘歲

苑氏南邑劉上達之妻夫沒家貧其姑勸以改嫁氏哭曰養兒備老積穀防饑我當送終以全婦道及姑死竭力塋埋冰霜愈勵

張氏城東桑梅之母自二十一歲妊子夫死三月而
生梅勤苦撫養年至八十有六子孫繩繩克食貞
節之報

辛氏南楊村民婦二十歲守節養姪承嗣教訓入泮
孀居六十餘年堅貞如一日

時氏北小王村民婦夫死年凶遇祖母染病思食肉
湯氏焚香割股以奉之知縣鄭瑛申上旌表

按以上俱
載舊志

王氏北楊村顏邦召之妻事姑盡孝每受箠楚承以

怡悅時或逢怒則長跪聽命退亦無怨邑侯旌其門曰盛世純孝

閆氏杜村庠生趙蒙鼎之妻二十六歲守節遺腹生男世昌家貧躬紡績事舅姑終始無間年逾八十猶勤女紅以爲未亡人不宜安坐也康熙三十年旌門

按王氏閆氏傳聞被旌遍查舊案無之不敢列入節義祠內均附舊志後備考

戴氏北楊村傅德成之妻二十二歲生子九日夫亡守節子又蚤世父母欲奪其志卽與父母斷絕往

來每日樵採茹荼不能聊生人有憐其苦者助以薪米不受隣婦呼爲瞎梗直亦不顧也卒年一百有二

按戴氏之節若此其苦戴氏之壽若此其高二者並符 旌格而學校竟不能舉然則窮鄉僻壤之湮沒不傳者可勝道哉亟採入志以闡幽光

張氏胡家莊胡四達之妻十八歲夫死無子晝夜哭泣父母勸其改嫁卽回夫家自縊人稱節烈無雙
王氏南邑鄧崇德之妻二十八歲守節九十三歲壽

終乾隆十三年閩學公舉學院呂公給以荻影霜

清匾額其子超之婦朱氏奉養盡孝五十餘年不
倦

聶氏西章吳尚仁之妻二十九歲守節生遺腹女愛
之有薄田五畝躬負鋤荷畚易之或憐其苦勸之
改適氏正色曰矢死靡他吾分也况有女在可令
其謂他人父耶年至七十諸生具呈學院給以節
並松筠匾額

李氏莊頭營師光先之妻二十四歲守節無子爲夫
立嗣茹荼守義卒年八十有六尹少宰表其閭曰

松筠晚翠

蕭氏窩頭村庠生劉元夢之母二十九歲守節善養
舅姑教子克家年逾九十猶紡績不衰子曲止之
則曰吾以勤率家人猶有惰者其敢以惰率耶有
餘則以周族黨之老者貧者無子者于節婦尤加
厚焉乾隆元年邑人士謀舉節孝氏聞而固辭謂
其子曰節孝吾分內事不可以此邀名越八年無
病而卒

時氏北小王村郝存仁之妻止生一女以姪郝哲爲

嗣節壽八十有六

李氏西莊頭村生員蘇遠之妻姑年八十病足不能
與居室煩悶氏則負以出入惟其所欲洗滌溺器
三載如一日時年六十有一矣尹少宰表其門曰
克全婦道卒年八十有三

雷氏北楊村王汝啟之妻二十九歲夫亡三月生遺
腹子錫貢撫養成人卒年七十有四

馬氏北楊村顏緯之妻守節撫孤卒年五十有九子
三省入邑庠

張氏北堤園胡士宏之妻二十九歲守節無子以夫
胞姪立嗣卒年八十

蘇氏堤園胡塏之妻二十九歲守節卒年七十有二
李氏西章吳上選之妻二十一歲守節事親撫孤孝
而且慈卒年六十有六

劉氏北顏村朱繼美之妻十九歲守節夫死三月生
遺腹子亮撫育克勤自置良田數十畝卒年五十
有九

蘇氏許村李大德之妻二十五歲生子一日夫亡守

節有舅無姑有叔無嬪居處不便寄食母家製衣送與舅叔紡績寒暑不輟卒年七十有四

馬氏杜村張綸之妻二十四歲守節翁姑衰老孝奉勤勞卒年四十有九

張氏陶墟馬文式之繼妻父母以其少寡無子欲改嫁之氏剪髮自誓姪甫生卽抱養七歲延蒙師朝夕紡績上供甘旨下佐脩脯撫嗣子食廩餼苦節三十餘年遠近嘆服

李氏陶墟馬棻秀之妻家貧窘繼姑老病多恚怒氏

勉供甘旨繼姑感悅撫幼孤勤紡織隆冬龜手不
輟姑歿殯歛盡禮次子入泮家業漸豐卒年四十
有餘

鍾氏南邑王學會之妻二十二歲守節以夫兄子爲
嗣善事舅姑卒年四十有七

周氏北白沙柴一山之妻二十歲守節門寒族單遺
孤稚弱艱苦備嘗卒年七十

劉氏北白沙王克勤之妻二十三歲守節舅姑老而
且貧遺子幼而多病諸叔賴以授室小姑待以出

閣粧奩什物皆由十指所出卒年五十有八

宋氏陶墟馬嶽秀之妻夫亡子坦方幼有薄田四畝
圖謀者逼嫁氏矢死靡他謹護其子旦夕不少離
茹荼飲泣歷五十載海寧陳相國督學順天錫匾
額曰輝流彤管

段氏莊頭村蘇超之妻三十歲守節甘淡泊勤紡績
卒年七十有八

馬氏莊頭村蘇越之妻二十九歲守節遺腹踰月生
男煥紡績爲生卒年八十有二

王氏馮村龐希愷之母二十二歲守節課子讀書甚嚴每閉于室不令出門希愷入府庠氏以八旬壽終

暴氏東墟村翟祥之妻二十五歲夫以疾貧出亡于外氏上奉垂老翁姑下撫六歲孤兒日夜紡績用以資生卒年八十有一

陳氏宋村徐元子之妻二十二歲守節有二女而無子夫方塋卽有諷之他適者乃涕泣應曰命該如此苦葫蘆浸入蜜甕亦不甜况有老姑無依曷忍

去從兄公元德聞其言心欽之遂爲謀嗣嗣子尋
亡又有勸以他適者仍涕泣應如前元德服其志
堅更擇族子繼之辛勤教育躬紡績事老姑不懈
姑歿盡哀盡禮以成大事卒年七十有一

常氏北祝村王載毫之妻二十三歲守節子天民甫
五齡時值竊賊滋蔓孤寡難存其兄常生輝接至
家爲之延師課子成名始歸王門宗緒賴氏以存
卒年六十

李氏許村蕭宏緒之妻二十二歲守節祖姑孀居氏

每夜伴宿養老不衰卒年五十有六

胡氏陶墟馬文淵之妻二十二歲守節撫四歲孤茹
荼忍死其祖姑患惡癩人弗敢近氏日夜侍奉不
避惡穢祖姑祝曰孫婦孝願其家道昌盛氏年七
十一堂四世喪殮裕如果如其言

閔氏陶墟馬齊之妻夫亡守志撫孤服甫闋夫之旁
支祖若叔利其少艾也而謀嫁之始而威逼繼以
毒毆氏抵死不從族人爲之鳴于官重責首禍者
氏身方安勤苦益力年未四十髮白齒落行年七

十操勞如故置田二十餘畝土房數間有孫四人
足徵苦節所感

胡氏南邑楊文錦之妻二十七歲守節事孀姑撫孤
兒歷五十載無怨言

按定例舉節青年矢志自首完貞如胡氏等則
過之無力之家竟不能達今俱入志以待採風
劉氏大墟于法祖之妻二十一歲守節子幼姑老仰
事俯畜五十七載備歷艱辛

王氏城東監生郟成德之妻十九歲守節一子襁褓
上有祖姑翁姑氏竭力操勞歷五十六載鄉黨稱

孝

韓氏西章庠生吳承宗之妻二十三歲守節孝養孀姑撫育幼子歷五十載長子廷幹之妻郝氏二十二歲守節無子卒年五十有八次子庠生廷模之妻龐氏二十八歲守節僅遺幼子兩世三節撫養一孤人稱姑婦同貞

陳氏金阜堡宋高之妻二十歲守節撫子成立勗以正道歷五十六載母教日章諸生具呈學院呂公表其門曰黃鵠嗣徽

張氏金阜堡程明心之妻二十四歲守節歷四十六載撫育二子成立

張氏大齊村冉子雲之妻三十歲守節歷四十五載教子文煥文新成家

趙氏堤園時秉彝之妻二十四歲守節歷四十五載益勵冰操

劉氏堤園時文之妻二十三歲守節家計貧甚事翁姑撫幼子歷四十載孝慈兼盡

馬氏杜家莊高有本之妻二十五歲守節孝事翁姑

持家勤儉歷四十餘年冰操益勵

苑氏南邑劉果之妻二十二歲守節勤儉紡績每年歸寧一次歷四十餘載未嘗有違

閔氏南邑王鳴謙之妻三十歲守節歷四十載艱苦備嘗

戴氏城東楊成貴之妻二十八歲守節事親撫孤持家勤儉四十五載敦行不怠其弟婦安氏二十一歲守節子女無出閨三十五載無異志子婦胡氏二十一歲夫亡事無巨細惟孀姑戴氏是依爲夫

立後視如已出守義亦三十年矣人稱一門三節
李氏北小王祝克一之妻二十二歲守節無子爲夫
立嗣歷四十二載如一日學院德公給匾旌門

王氏南邑張大賢之妻二十九歲守節竭力雙親撫
孤兩世歷四十載勤儉克家

劉氏南關鄭燾之妻本富家女也于歸時裝遣甚盛
兩婢扶掖而行見者謂其不能負苦頃之夫亡家
業盡落婺居方二十三歲守節逾四十餘年操比
柏舟道窮周易尹觀察表其門曰苦節可貞

留氏龍堂劉塲升之妻二十五歲守節家赤貧翁姑
老生養死葬竭力盡禮一子出亡不知所之氏寄
食母家歷四十餘載永貞自矢

劉氏邑中王崢之妻二十七歲守節無子以夫胞姪
順祥爲嗣歷四十四載無違德

門氏鳳凰堡靳家安之妻二十五歲守節歷四十一
載教子德章成名督學程公給以茹藥丸熊匾額
張氏南邑生員苑良弼之繼妻二十七歲守節事姑
戴氏生養葬祭無不盡誠歷四十載無間言其姪

婦王氏乃廩生苑瑄之繼妻也二十九歲守節洗
盡繁華甘受清苦歷二十載無怨聲又故儒苑紘
之繼妻劉氏二十八歲守節歷十八載艱苦備嘗
人稱三義流芳萃于一門

馬氏屯莊解志仁之妻二十八歲守節子文方在襁
抱歷四十三載撫孤成立

劉氏北小王監生祝剛健之妻二十四歲守節善事
舅姑子女全無夫弟初生一子氏卽懇求爲嗣歷
三十七載人稱節義

張氏城東鄒星辰之妻十九歲守節無子善事舅姑
勤苦紡績舅姑歿竭力發喪歷三十載鄉黨稱孝
劉氏城東鄒行山之妻夫亡子幼翁姑年老仰事俯
畜歷三十五載備極艱辛

羅氏城東楊臣之妻二十一歲守節舅姑衰老孝養
無違歿後殯葬如禮而家業日隆隆起其父母家
貧無以自給氏迎養于家爲置莊田以安其身歷
三十五載教二子龍旗龍標俱入庠

朱氏南邑增生王夢麟之繼妻二十九歲守節善奉

翁姑曲成孫子歷三十四載如一日

韓氏東章尹德一之妻二十五歲守節遺孤二歲勤儉自持歷三十五載家業日興

鄧氏南邑苑夢弼之妻二十八歲守節紡績以事翁姑勤儉以課弱子歷三十三載益勵貞操

安氏堤圈趙宋堯之妻二十六歲守節爲夫置嗣歷三十餘載無違德

郝氏西章劉學仁之妻二十八歲守節以夫胞姪爲嗣織布度日歷三十餘載不渝初志

劉氏大齊安居敬之妻三十歲守節歷三十二載撫
子貴成立

蘇氏南白沙村劉來遲之母年未三旬夫亡月餘遺
腹生男歷三十年子亡媳改適氏白髮蒼蒼門庭
闐寂以壽終于家守節尤苦

李氏堤圈胡文式之妻二十九歲守節歷三十載婦
道母道兩無遺憾

劉氏馮村任義聖之妻二十二歲守節無子翁姑繼
亡氏從夫兄度日不數年夫兄又死隻身茹荼歷

三十五載矢死不變

胡氏堤圈馬汝霖之妻二十八歲守節撫夫姪忝爲
嗣忝娶王氏月餘亦死胡氏憐其少寡撫媳如女
覓忝從姪雲輝爲嗣姑婦苦節內外交稱

馬氏名好心齋之女也適王生湄二載而寡熒獨無
依父命歸室與諸子婦析產全貞獨居三十載節
比柏舟行高大雅鄉黨稱爲女士居

彭氏北楊村顏綬之妻二十二歲守節以夫胞姪三
達爲嗣學院金公給以志凜秋霜匾額

馬氏北楊村傅廷佐之妻二十二歲守節子經邦甫
三月教育入泮氏年五十有二闔學公舉學院德
公給以陶孟遺徽匾額

李氏陶墟馬碩秀之妻夫既死復張目氏哭祝曰君
恐兩世老人無養耶我任之目遂瞑家赤貧艱苦
撫孤兩世殯殮竭蹶備至鄉人無不感嘆

馬氏小店楊文煥之妻夫亡守節撫從姪奇琮爲嗣
勤苦操作教子入泮

閻氏吳家莊生員吳茂林之母二十二歲守節嚴於

訓子既入膠庠猶不寬假卒年八十有三

楊氏庚辰孝廉李受書之母受書三歲而孤父泮甲辰副榜好學短命兩弟偕亡仲婦王氏無子季婦姜氏僅存遺腹母率妯娌安貧勵操孝事舅姑撫育幼子鄉黨號爲一門三節尤稱楊氏義方之訓

王氏莊頭營李進賢之妻二十九歲守節爲子宗廣娶婦何氏結褵五載宗廣亦死何氏侍養病姑撫姪文輝爲嗣人稱其以節繼節以孝繼孝

王氏北小王祝見龍之妻舅老鰥居年逾八十有惡

瘡不能動履大小便皆氏扶持鄉黨稱爲孝婦

馬氏邑中儒童王永瑋之妻二十二歲守節甫生一女矢死靡他歷三十載舅姑亟稱其孝

王氏陳村楊紹先之妻二十六歲守節歷三十載事舅姑以孝教孤子成名

附錄

蕭氏馬姓妻初嫁時飲食起居與人無異居數月夢人啖之以桃覺而恒飽不復飲食年餘顏色敷腴壹切女紅職勞不倦孕育子女數人自崇禎時至康熙中四十年未變也

按蕭氏之事詳見府志雜記內當時必傳爲異聞然所謂四十年未變者終歸于化今並不知其里巷矣可見好奇不如庸行之足尚也附錄備攷

楊氏北小王村郝琇生之繼妻十九歲守節以夫堂弟子郝緒承嗣歷二十八載益勵貞操

按定例舉節必以三十年爲斷凡入志者俱核實直書不敢稍有假借今楊氏之待旌止少二年耳亦在附錄之列以俟他日公舉其實節義之志定于壹日卽貫于百年矢死靡他豈有變塞此聖人剛詩所以獨存柏舟也今特竊取其義並錄于後以爲左驗

劉氏北彥朱青美之妻二十九歲生子兩月夫亡守節灌園紡績奉事舅姑撫養孤兒歷二十六載不變塞焉

郝氏莊頭蘇讓之妻三十歲守節無子事七旬翁姑以孝聞歷二十餘載堅貞如故

周氏東章王貴毛之妻夫貧日癯甘心和諧夫亡守

節乞食撫孤歷二十六載無怨言

劉氏莊頭蘇作櫛之妻二十四歲守節孝事孀姑撫養孤子二十餘年絕無他志

閆氏南邑盧振山之妻二十七歲守節事姑克盡婦道育子曲致恩勤歷二十二載治家就理

李氏南邑吳通之妻家無田宅父母欲奪其志氏堅不從奉八旬翁姑克完大事撫未歲弱息俾得成立歷二十餘年慈孝兼至

閆氏季媿堤圈馬澍霖之妻澍霖夙嬰瘵疾其家人

請以婚喜厭之合卺七月而澍霖死是時季媿年
十有七毀容衰服執喪守禮奉疲癯之舅事繼室
之姑與伯叔一體孝養送死無憾爲夫立後延師
課讀勗以成名年逾四十語及亡者輒嗚咽如初
喪

齊氏北楊村杜繩先之妻二十三歲守節家貧翁老
子幼有勸之嫁者氏泣曰姑亡夫死老少何依毀
容貌勤紡績屢值荒歲糠粃自甘粟米盡奉君舅
以至菜色終年年近五十百折不回

郝氏莊頭蘇德嵩之妻二十三歲守節家貧子幼紡績以撫育之歷五十餘載志節益堅

王氏西章劉云煥之妻二十三歲守節翁姑在堂子僅三齡並無田地日勤紡績歷二十餘載備極艱難

蕭氏蠡村庠生李士元之妻二十四歲夫亡一慟幾絕其姑慰之曰吾家赤貧汝年幼無子何妨他適氏泣曰男有百行女有一節安知其他姑若疑我是斃我也欲自縊姑憐其志堅立嗣堂姪以安其

世興志 卷六
心歷二十餘載苦節如初

蘇氏張家營張維翰之妻二十三歲守節以姪爲嗣
歷二十三載得翁姑歡心逢人稱爲孝婦